

Апамның жеңісі менің жеңісім!



Менің әжем, оны мен апа деп атайтынмын. Апаның (Әженің) баласы болу – әрбір кара домалақ қазақ баласының болмысы. Апам мен менің арамыздағы туыстық байланыс өте нәзік әрі берік болды. Бұл кісінің тәрбиесі арқылы жақсы-жаманды ажыратып, үлкен-кішіні таныдық. Мінез-құлық, тіл тәрбиесі, үй шаруасына бейімділік, елгезектік, тілалғыш, мейірімділік осы қасиеттерді сіңіріп, таптырмас тәрбие мектебінде өстік. Бұл тәрбие мектебінің үлкен ұстазы талай тағдыр талқысын бастан кешкен менің апам – Ұлы Отан Соғысының ардагері Балабаева Қамария Садыққызы болатын.



Жеңіс күні – ең ұлы мереке. Биыл Ұлы Отан Соғысының аяқталғанына – 75 жыл толып отыр. Апам 1924 жылы Қостанай облысы, Аманкелді ауданындағы № 5 ауылында дүниеге келген. 1942 жылы қазан айында Аманкелді аудандық әскери комиссариаты арқылы әскерге алынып, бір жыл Орск қаласында дайындықта болып, 1943 жылы Украина майданына аттанған. Осылайша 18 жастағы қазақ қызы өз еркімен майданға аттанып, жауынгер атанған. Соғыс аяқталғаннан кейін қираған елді мекендерді тазарту жұмыстарына қалдырылып, 1946 жылдың желтоқсан айында елге оралған. Жеңісті де, кейінгі бейбіт өмірді де көріп, соғыстан кейін күйреген шаруашылықты қалпына келтіруге тер төккен. Ел басына күн туған қиын-қыстау күндерде олар азамат жүгін арқалап,

уақыт сынынан, тарих талқысынан сүрінбей өтіп, батырлық пен табандылықты, Отанға шексіз берілгендіктің жарқын үлгілерін көрсетті. Апам осы батырлығы мен табандылығының арқасында II дәрежелі Отан соғысы ордені, «1941-1945 жылдардағы Ұлы Отан соғысында Германияны жеңгені үшін» медалі және КР-ның Тұңғыш Президенті Н.Ә.Назарбаевтың 2010 жылғы 30 сәуірдегі жарлығымен «Ерен еңбегі үшін» медалімен және жеті мерекелік медальдарымен наградталған.

Ардагер аталарымыз бен апаларымыздың арқасында біз бүгін бейбіт аспан астында өмір сүрудеміз, қуатты мемлекет құрудамыз және болашаққа сеніммен қараймыз... Сол кезде болған жеңіс және біздің қазіргі жетістіктеріміз бір-бірімен тікелей байланысты.

Ұрпақ үшін қан төккен аталарымыз бен апаларымыздың Жандары мәңгілік жәннатта болсын, Аманаттарын Перзенттері бұлжытпай орындайтын иман берсін!

М. ҚОҒАБАЕВ,
Арқалық қалалық сотының
кеңсе меңгерушісі.